



KUM 2012 BRANCH OB TUR THLANNA NEIH A NI

Chanmari West December 25 : Ni 20.12.2011(Thawhle) zan khan Kum 2012 atana Branch OB tur thlanna YMA Zawlbuk-ah Pu Lalchungnunga CEC Member, CYMA kaihhruaina a neih niin, President atan Pu T.Ngurkhuma thlan a ni.

Hruaitu thlanna hun hi Session 2 ah then niin, Session khatna hi President Pu T.Ngurkhuma'n a kaihruai a. Upa Lalsangzuala Hauhnar in hunserh hmangin Zaithiam tak tak in hun an hmang baw a ni. Pu Lalchungnunga Ex. CYMA President leh CEC member ni baw chuan thu tha tak tak a sawi baw a ni.

Secretary Pu R.L.Thanhnuna hnen atangin hetiang hian kum 2011 report ngaihthlak a ni.

1. Kum 2011 chhung hian YMA member 2516 awmin mipa 1671, hmeichhia 845 leh Life member 156 an awm a ni.

2. Kumin 2011 hian YMA Chanchinbu copy 97 lak niin YMA AW copy 935 tihchhuah a ni baw.

c) Kum 2011 January atanga Ni 31.12.2011 thlenga mitthi kan neih dan hetiang hi a ni :

- i) Mitthi (Kan thlanmuala phum) : 37 (Ruang lak chhiar tel a ni)
- ii) Ruang thawn chhuah : 9
- iii) Ruang lak : 1

Heng mitthi 37 kan neih zingah hian kan Branch YMA member mi 11 (Life Member 2) in min boralsan a ni.

3. Association for Voluntary Blood Donation ten thisen pe tha lawmman an siam ah lawmman 2-na kan dawng a, Dekchi leh Citation a keng tel a ni. d) Ni 13&14.10.2011 chhunga CYMA leh Art & Culture Deptt. te tangkawpin 10th CM Running Trophy in Cultural Dance Competition a buatsaih ah tel ve niin he intihsiakna ah hian a pumpuiyah lawmman 3-na dawn a ni.

4. Ni 9.11.2011 khan ASEP te'n nungcha humhalh tha chawimawina an buatsaihah, kan Branch YMA ten chawimawina NOPUI lawmman kan dawng. He chawimawina atan hian

Dekchi leh Citation dawn a ni.

5. Ni 18.12.2011 (Sunday) zan khan vengchhungah Krismas Prsent a theih ang ang sem pahin Carol Service hman a ni.

6. Kum 2005 atanga YMA Zawlbuk kan sak chhohah vengchhung atangin Zawlbuk Fund engemawzah veng mipuite thahnemngaihna zarah khawn a ni tawh a, Fund thawhtu zawng zawng chungah Branch YMA chuan lawmthu a sawi takzet a ni. Sum hmuh zawng zawng hi Rs.8,33,860/- a ni.

7. Kumin 2011 chhung hian mi harsa te hnenah tanpuina Rs. 1,26,020/- semchhuah a ni.

8. Ni 17.12.2011 thlenga Chanmari West Branch YMA sum dinhmun hetiang hi a ni :-

Income : Rs.18,44,602/-
 Expenditure : Rs.15,26,512/-
 Balance : Rs. 3,16,539/-

Session 1-na ah hian mi harsa te pualin thawhlawm khawn a ni a, Rs.5949/-hmuh a ni.Kumin 2011 chhunga member boral te sunna hun Chairman kaihhruainain hman a ni baw.

Session 2-na hi Kum 2012 atana hruaitu thlanna hun Pu Lalchungnunga R.O kaihhruaina in neih a ni a, heng mite hi thlanchhuah an ni :-

- President : Pu T.Ngurkhuma.
- Vice President : Pu R.Lalhmachhuana
- Secretary : Pu R.L.Thanhnuna
- Assistant Secretary : Tv.Zairemmawia
- Treasurer : Pu C.Lalzarliana
- Finance Secretary : Pu K.Darthantluanga

Branch News

Principal New Horizon School-in kan Branch YMA te Sound System (Combo) ` 30,000/-man zet min pek avangin,an chungah lawmthu sawi a ni.

Ni 18.12.2011 zana Krismas Carol Service neih ah rawn tel YMA Memeber zawng zawngte,nu leh pa rawn telte leh carol te ei leh in tur lo buatsaihtu Neuva Section te chungah lawmthu sawi a ni.

Ni 20.12.2011 zana kum 2012 chhunga kan Branch O/B turte thlanna kan neih a,member kalkhawm ten mi harsate tanpuina atana thawhlawm kan thawhkhawm chu ` 5949/-a ni

Section tinah YMA te duty a ni a,harsatna leh buaina nei chuan duty te hriattir vat turin kan in ngen e.

EDITORIAL BOARD

CWBYMA member zawng zawngte YMAAW Editorial Board chuan Krismas leh Kumthar chibai a buk takzet che u a ni.

LUSUNKHAWHAR

Ni.20.12.2011(Thawhle) zan Dar 11:30 khan Pi Lalthanzuali (86) M/o Pu Lalchhuanawma (Chatea) K-Section chu a boral a, Pu Lalthanliana H/o Zopari (59) CH-Section chuan Ni 23.12.2011 khan min boralsan baw. Chhiat taw chhungte Br.YMA chuan a tawrhpu takzet a ni.

TUNKAR CHANGVAWN

I chhungah ka lo lut ang
 e, I thinlung kawng min
 lo hawn rawh. Tiin LAL
 ISUAN a dil fo thin che
 a sin. Engtinngge i chhan
 ve dawn le ?

Editorial Board

Editor

RK.Rozidinga
9436142304

Joint Editor :

RK. Malsawmkima
9862578441

News Editor

Tv. Thangkhuma
9862303135

Pu Vanlalhluta
9862366308

Tv. Vanlalfawna
9856301975

Cir.Manager

Johny Lalthanpuia
9612359161

Jacob Lalrinsanga
9612319779

Production

Manager
R.Lalmachhuana
9436151817

Branch Office Bearer

President

T.Ngurkhuma
9436190843

Vice President

R.Lalmachhuana
9436151817

Secretary

RL.Thanhnuna
9436152760

Asst. Secretary

K.Darthanthuanga
9436196071

Treasurer

C.Lalzarliana
9436142049

Fin.Secretary

Lalthuamluaia
9612216649

Advisers

Pi Zamanthangi
Pu Vanlalsawma
Pu Rothuama
Pu Lalbiakthanga
Khiangte

Nang erawh chu engkimah fimkhur la, hrehawm tuar la, Chanchin Tha hriltu lam hna thawk la, i rawngbawlina kha hlen rawh. II Tim 4:5

Editorial : Kum 2012 chhunga kan branch hruaitu tur member-ten kan thlang fel leh ta. YMA hruaitute hi member-ten kan siam a ni a, anmahni mai chuan kan beisei ang thil an ti thei lo vang. A siamtu member-ten kan thlan chhuahte thlawpna kan pek tlat hi kan mawhphurhna a ni tih a thara kan hriat a ngai. Hruaitu tharten ruahmanna siama ke an penna kawngah anmahni thlangtu member pum huapa rorel leh hmalak an thiam tel a ngai ve bawk. Chuti chuan inchawmtawnin phei khai rual zawkin YMA hmalakna leh thiltih hrang hrangah hruaitu leh member kan kal tlan theih a rinawm.

European football :

Stiker invawrh sang VAN PERSIE, GOMEZ

- T-a

Krismas vuakvet hi Premier League buai hun lai tak a ni a, Bundesliga erawh chuan thlasik chawlh an hmang thung.

Spanish Liga-ah Lionel Messi leh Cristiano Ronaldo an intlurbing leh a, tluk rual lovin player pahnihte hi European football-a che tha ber an ni dun leh mek.

Goal thun thei hi striker an ni mai a, Messi leh Ronaldo hi tunlaia striker ropui pahnih an nih laiin, Mizoten striker tia kan sawi deuh bik centre-forward aiin winger lama khel tam zawk an ni a, mahse, striker dik tak an ni thung.

Centre-forward zingah mi pahnih thur chhuah ngam khawpa che tha an awm. Arsenal captain Robin van Persie leh Bayern Munich hitman Mario Gomez an ni. Van Persie hian calendar kum chhunga Premier League-a goal khung hnem ber ni turin goal hnih a la mamawh a, kuminah khelh hnih an la nei.

2004 khan Gunners boss Arsene Wenger chuan man tlawm takin Van Persie a la lut a, Dutch club Feyenoord atangin pound mtd 2.75 sengin a lei.

Kum eng emaw zat hnuah Arsenal player ropui zinga mi Dutchman Dennis Bergkamp-a hnung zuiin London hmar veng club inngahna lian a thei ta a, Arsenal tana goal thun tam ber Thierry Henry-a hmun ruak a hnawh khat bawk.

Kum 28 mi Van Persie hian 2011 chungin Premier League-ah goal 34 a thun a, Arsenal tana calendar kum chhunga goal khung tam ber Henry-an 2004-a goal 34 a tihluh a tluk chiah. Netherlands striker hian calendar kum chhunga Premier league-a goal thun tam ber Alan Shearer a hnaih hle tawh a, 1995 khan Blackburn tan Shearer hian goal 36 a khung.

"He hlawhtlinna avang hian ka hlum a, ka inchhuang; ka tum ber erawh a ni lo. Kumina ka khelh dan danglam ta thut hi kei pawhin ka hrethiam lo va, goal ka thun thei a ni," a ti.

Van Persie hian Arsenal-ah season sarihna hmang mekin season hmasa ber 2004-05-ah league goal nga, a dawtah goal nga bawk, goal 11, sarih, 11, kuate thunin season a hmang chho. Season hmasa khan hliamin tihbuaiin chaw hma lam a khel thei mang lo; chuti chunginleague-ah goal 18 a thun a, hengte hi kumin January-May inkar veka a khung a ni.

Tun season-ah league khelh 17 hmachhawnnin goal 16 a khung tawh a, top scorer a ni. Season kal mekah hian inelna hrang hrangah vawi 23 inkhelin

goal 20 a tilut.

Season tirah Arsenal an talbuai a, August khan Manchester United-in 8-2 in an hneh. Hetih lai hian league-ah 17-na an ni a, mahse, tunah hian pangana luah chhovin palina Chelsea aiin point khatin an hniam a, hmahruaitu Man City nen an inkarah point 12 a awm.

Henry chuan Arsenal-a a khelhpui hman leh a record tluktu Van Persie fakin, heti ang dinhmun hi a thlen a beisei ngam lo tih a sawi a, tunlai striker zingah Messi leh Ronaldo tih lova tha ber a ni a ti.

German league lamah Gomez chuan amah atanga a tha ber leh vawrtawp a hmang mek tih a sawi. Bayern Munich striker hian tun season Bundesliga khelh 16-ah goal 16 a thun a, Champions League-ah goal sarh tilut tawhin Cup nen inelna hrang hrang khelh 25-ah goal 24 a kawl mek.

Kum 26 mi Spanish thisen kai Germany international hi Bundesliga striker zinga sawifiah harsa a ni a, a vul laiin a vung em em a, a hniam laiin a che chhe hle thin. Mahse, season liam ta atangin Gomez hi a puitling a, Bayern player pawimawh ber pakhat a ni Chiang ta hle.

Stuttgart atangin a hming a chher a, 2009 khan Bayern-in leiin Bundesliga player man to ber a ni. A man peng dang nen euro mtd 30-35 vela hlua ngaih a ni.

Gomez hian kum thar Euro-ah ram tan hnuhman lian hnutchhiah a inbeisei a, Bayern atangin Germany international striker tha pahnih Miroslav Klose leh Lukas Podolski pet chhuakin a luahlan fel tawh a, Germany rinrawl a nih ngei a inbeisei sang hle.

2010-2011 season khan Bayern tan inelna hrang hranga khelh 45 hmachhawnnin goal 39 a thun a, 2011 calendar kum chungin hian league-ah goal 31 a thun.

Gomez chuan : "Ram tana khelh phak ngei tumin ka theihna engkim ka chhuah. Euro thlenga ka khelh dan ka vawngnim thei a nih chuan coach thu a ni a, heti chungu min thlang lo a nih chuan kei chuan tihtheih ka nei tawh lo," a ti.

Gomez hian German club ropui Bayern tan season thumna hmang mekin, Bundesliga-ah tum 113 inlan tawhin goal 76 a khung. Bayern player ropui leh club tana khung tam ber Gerd Muller-an Bundesliga tum 427 a khelhah goal 365 a tilut ve thung.

Khelh zat atanga chhuta thun tamah Gomez hian Muller a khum tawh. Mahse, a thun zat tluk turin hmabak a la ngah hle a, 1971-72 season khan Muller hian season khat chungin league goal 40 a thun thei a, Bundesliga record a la ni reng.

Premier League Fixture

Dec 26 zan

06:30 Chelsea v Fulham
08:30 West Brom v Man City
08:30 Sunderland v Everton
08:30 Man United v Wigan
08:30 Liverpool v Blackburn
08:30 Bolton v Newcastle
01:15 Stoke v Aston Villa

Dec 30 zan

01:15 Liverpool v Newcastle

Dec 31 zan

06:15 Man Utd v Blackburn
08:30 Swansea v Tottenham
08:30 Arsenal v QPR
08:30 Stoke v Wigan
08:30 Bolton v Wolves
08:30 Chelsea v Aston Villa
08:30 Norwich City v Fulham

Dec 27 zan

08:30 Arsenal v Wolves
10:30 Swansea v QPR
01:00 Norwich v Tottenham

VANAPA

Inthlanna a member kal zawng zawng te leh chanvo ruat te zawng zawngin hneh taka an hna an thawh theuh avangin Section in lawmthu a sawi tak meuh meuh ani . Member 50 kal tling awmchhun Section kan ni bawk. Member te thawhrim vanga Kumtluana Section hrang hrang te inelna thianghlimah Pakhatna dinhmun an hauh thei chu lawmawm an ti takzet ani.

Branch YMA Carol na a member bakah nu leh pa valai telpui tu te zawng zawngchungah Section in lawmthu a sawi.

Duty Post hawwna ni 17.12.2011 zan khan neih ani a, Branch President hlui leh thar Pu T.Ngurkhuma'n hawwna hi a nei. Duty na hi Pu C.Ramparlana te in chungah siam ani a, an chhungkaw chungah Section in lawmthu a sawi nawn leh mawlh mawlh ani.

Meihawl Bag 1 Pu Ronald Lalkhuma'n Duty te tan a pe. Ex Leader te Pu Saihnuna Sailo, Pu Rochungnunga leh midang dang ten Duty ei tur an hlui deuh reng bawk.

Kartir lam khan OB ten Section chhunga damlo hriat theih ang ang te an tlawh kual. Zirtawp tlai khan Tv.Liandanga S/o C.Ramparlana Civil Hospital-ah khawsik vangin dahluh a ni.

An member Tv TC Vanlalthanpuia s/o TC Lalremsiama leh NI Lallawmkimi d/o R.Lalbiaksanga (L) te Karate ah All India Tournament khelin National Games atan an Qualify.

Section member Zirna, hnathawhna leh thildang vanga hmun dang danga awm Krismas leh Kumthar hmang tura lo haw zawng zawng te Vanapa Section in alo lawm a che u.

KHUANGCHERA

Pi Thanzuali Kum 86 chuan ni 20.12.2011 a chatuan ram a pansan chu a ui hle. A kalsan tak a chhungte an tawrhpu hle.

Ni 20.12.2011(Thawhlen) zan a Branch Hruaitu thlanna-a member kal te chuangah an lawm hle a, member 400 chuang awmna Section ni chunga mi 50 pawh an kal tling lo erawhchu pawh an ti hle, member-te inenfiah turin an chah.

Branch Office Bearer thlan tharte chungah duhsakna an hlan, Kum

(K-Section Report chhunzawmna)

2012 chhunga YMA an kaihhruaina turah theihtawpa thawhpui an tum.

Section thleng engemawzat a awmna chin hriat a ni lova, a chin hria chuan a ranglama hruaitute hnenah thlen tur a ni.

An Section Treasurer nupui Damdawi-in a awm pawh inlama inenkawl turin a rawnchhuak a, Dam zel turin duhsakna an hlan.

Section Asst. Leader fapa Pu Ramthamghaka chuan Police Department-ah hna tha tak a hmu a, thinlung takin an lawmpui hle.

Ni 18.12.2011(Pathianni) khan an section hruaitu boralta Pu K.Lalengmawia (L) ralna hun an nei a, tawrhpuina thuziak mawi tak leh Dekchi lian tha tak pek an ni.

CHAWNGBAWLA

Section huam chhungah ngawrh takin Duty kalpui mek a ni a, tun thleng a buaina leh bengchheng siam an la awm loh avangin Section hruaitute an lawm hle. Krismas leh Kumthar hlim taka hmang turin member-te duhsakna an hlan.

Pu C. Lalramdina chuan Section Duty-ten a tul apianga an hman turin Rs. 1500/- a pe a, Pu C. Laltanpuia'n Meihawl leina tur Rs. 600/- a pe bawk a, an chungah lawmthu an sawi. Duty thingpui lum thintu Pu R. Thansanga te chhungkaw chuangah pawh lawmthu an sawi bawk. Tin, Pu Manga, an Section Committee Member chuan Duty-te ei turin Wai Wai a rawn pe bawk a, a chungah lawmthu an sawi bawk.

Pu Lalthanliana Kum 59 chuan pumna vangin ni 23.12.2011 zing dar 5:30 khan chatuan ram a pansan a, a kalsan tak a chhungte an tawrhpu hle.

Tv. C. Zonunmawia (Mapuia) S/o C. Sangkhuma chu Care Hospital-ah Chuap lam that loh avangin a awm a, a thatchhuah leh thuai an duhsak.

NEUVA

Krismas leh Kumthar hlim taka hmang turin member-te duhsakna an hlan

Krismas leh Kumthar vuakveta duty tura ruat zawng zawngte thahnemngai taka Duty thin turin an in ngen.

Ni 27.12.2011(Thawhle hni) hian hnatlang koh tum a ni a, Section

(N-Section Report chhunzawmna)

hruaitute lo inring lawk turin an in chah Section thil tih apianga hmanrua leh in phal taka hman tir thintu Pu John Lalfakzuala te chhungkaw chungah lawmthu an sawi.

Ni 30.12.2011(Zirtawpni) hian rokhawlna dang a awm loh chuan Section Kumtawp Meeting koh tum a ni.

Pu G. Zama leh L.S. Bakery inkar Side Drain-a bawlhhlawh paih thin an la awm fo mai chu ang ngaimawh hle.

Turning Point-ah Motor a tam leh ta hle mai, Lirthei inher t1ur leh kawnga kalte tan a hnawksak em avangin dah tawh lo turin an ngen.

Zawlbuk Point-a Gas sem leh hunah Sl. No. 62-111 inkar sem a ni anga, Local Council Card leh Biakkungi Consumer Card neilote lak tumlo turin an hriattir.

Pu Zothansanga Tochwawng in Section in a tul anga hman atan Chini 10kgs a pe a, a chungah lawmthu an sawi.

TAITSENA

Branch Office Bearer thlan tharte chungah duhsakna an hlan a, Branch YMA mai nilo Section tan pawha thahnemngai taka thawk theuh turin an ngen.

Tlawmngaia Mitthi Buhfai khawntute leh YMA AW semtute chungah lawmthu an sawi takzet.

An hruaitu Pu Lalmingliana S/o Lalrotluanga chuan Mizoram University hnuai ah Assistant Professor (Deptt. of Computer Engineering) hna a hmu thar a, an chhuangin an lawmpui hle.

Mipuite hunpui laia kan him zawk nan Duty chhunzawm zel a ni a, member-te leh hruaitute tlawmngaia duty theuh turin an in ngen.

Section chhungah zurui buai leh bengchheng siam lo turin an in ngen a, hetiang ang buaina siam an awm chuan thuneitute hnenah hlan zel an ni ang..

**CHANMARI WEST
MISTIRI ASSOCIATION**


Kum 2012 hruaitu thlanna leh kumhlui thlahna ni bawk neih an tum a, hetiang hian programme an duang

A Hun : Ni 30.12.2011(Zirtawp)
Zan Dar 5:00 p.m

A Hmun : Pu Lalrinmawia Ralte In
Chaw hlui kilho nghal tur a nih
avangin Association member-te chu he
hunah hian kal vek tur a ni e.

CHIBAI BUKNA

Pathian kaihhruaina avangin kum 2011 Krismas chu kan lo thleng ta a, he hun min hruai thlengtu Pathian chungah lawmthu kan sawi a. He hun hlimawm tak lo thlengah hian Chanmari West Branch YMA chuan vengchhung mipuite Krismas chibai kan buk che u a, hlim taka hmang turin duhsakna kan hlan a che u.


(T. NGURKHUMA)
President


(R.L. THANHNUNA)
Secretary

CHANMARI WEST BRANCH Y.M.A.

THIL CHHAR

Motor ke chhar a ni a, hrechiang duh chuan a hnuai hming tarlanah hian ngaihven theih a ni e.

Ramparlana (V-Section)
Ph.No. 9774783006

CHHUANAWM

Pu Lalmingliana S/o Lalrotluanga (T-Section) chuan Mizoram University hnuai h Assistant Professor (Deptt. of Computer Engineering) hna a hmu thar a, hetiang ang mi chhuanawm tak leh mithiam kan vengin kan nei thin hi a chhuanawm takzet a ni.

AWARENESS SEMINAR

Natna runthlak tak Alzheimer's Disease chungchang Awareness Seminar chi Ni 29.12.2011 (Ningani) Zing Dar 11a.m hian Chanmari YMA Hall-ah Lengzem Chanchinbu chuan Dr.Hrekima leh mithiam dangte ruaiin a buatsaih dawn a. Chhungkaw tin leh khawtlang tana hriat mamawh thil nih avangin lo tel ngei turin mi tinte kan sawm e.

Sd/- VANNEIHTLUANGA
Editor, Lengzem thlakip
Chanchinbu

**E.V.A. Enterprise
Vaivakawn, Hunthar Peng**

SHARP company kutchhuak, TV-LED, LCD, FRIDGE, WASHING MACHINE, MICRO-WAVE OVEN, VACUUM CLEANER etc. man tlawm takin kan hralhchhuak ta chur chur mai, min dawrtu-te FREE GIFT, kan pe zel e. HOME DELIVERY kan tihsak thei baw e. Pan manhla tak a ni.

Contact :-
8575571992/8974576343.

(1-3)

LODESTAR SCHOOL

Admission Opened
For 2012 Session

KG-I to Class VIII

Free Admission for KG-I

Contact :
0389-2340281/9862711823

(2-4)

THLALAK DUHTAN

**Chhiatni / Thatni,
Chhungkua leh Birthday
etc. thlalak duh tan koh
theih kan ni e.
Thlalak Edit leh Thlalak
hlui chei kan ti thei
bawk.**

Contact :-

C.Lalmangaiha (Te-a)
S/o C.Laltanpuia

Chanmari West, Kawipui chung
9615471892 / 9206194751.

(1-2)

NEW HORIZON

SCHOOL OF EDUCATION
Day & Residential School
Admission Opened

for 2012 Session

Class I - XII (Arts)
Special Features :

* International Standard
Digital Learning Technology
hmanga zirtirna school

* Offers Spoken English & Hindi
* English Accent Training Class
* Co-scholastic activities tangkai
ngah ber School
* Kuntin Board Exam Result
tha kan nei thin
Class hniam ber Class - I tan
Free

Admission + free frock/trouser

Contact : (0389) 2346362
9436141868 / 9612228372

(4-9)

HETAH HIAN SMS LA

>>>8794162539<<<

YMA Park-a motor Maruti 800 (A var) MZ01 B 73.. hi tu motor nge ? YMA a va zah lo ve. Issue hmasa-a dah phal loh thuchhuah kha a chhiar ve lo em ni.

961215__30

(Motor dah kan la awm fo mai a, hei hi i sim teh ang u. Midang dah duh tam tak an awm laia Phal loh a ni tih chhuah fo chungah la dah luih fo hi YMA a zah loh thlak hle a ni)

Hruaitu tha tak tak kan thlangchhuak leh a, membenten i tawiaawmin an ke ti chak turin theihtawp i chhuah theuh ang u.

897436__22

YMA member 2000 chuang kan nih laia inthlan zana kan kal dan kha chu a zawngchhangthlak loh ngawt mai. Zanga tal chu tling tur asin kan nih mawle. Memberte i in enfiah theuh ang u. Sport na a kan tam tehlu nen.

961245__89

Kum 2011 chhung khan engangin nge khawtlang/YMA tan i lo in hman ve? Mi tana hnawksak in nge ? Thenawmte tana ninawm khawpin. Khangte kha 2012 ah chuan kalsan i tum theuh ang u.

986266__23

Krismas leh Kumthar kan hmanna tur ah hian nu leh paten kan fate theih chin chinah uap theuh tum ila, result thalo leh midang tana hnawksak mai lova an khawksak nan i tawngtaipui theuh ang u.

977256__96

YMA Zawlbuk ah ngei mai Inthlanna hun kan han hmang thei kha memberte leh hruaitu inpe tak tak te hmalakna zar tak meuh a ni e. Chhunzawm lehzelnah turh ruahmanna feltak nena kal zel turin duhsakna ka hlan a che u.

986266__21

(SMS kan dawn te hi Ed. Bd
ngaihndan a ni vek kher lo)

**ROYAL ENGLISH
ACADEMY
(Comprehensive)**

Chanmari, Chaltlang Road.
Class - V to Class - X
Day leh Hostel
admission a tih theih e.
HSLC Result hnukung ber
ah 100% pass a ni.

Contact :-
9862375083/9612297127.

(1-6)